

Porta lo bay hues pa exige extension

Awe deadline ta cay pa Hard Rock Hotel

ORANJESTAD — Abogado di Southwest Horeca Development Milko Baiz ta bisa cu tin diferente opcion pa su cliente si acaso gobierno dicidi pa no otorga e opcion pa e tereno di Bushiri Hotel pa nan traha un hard Rock Hotel. No ta descarta cu lo bay hues pa toch por haya un extension pa asina nan keda cla cu nan financiamiento.

Mañan e deadline ta cera pa Southwest Horeca Development keda cla cu financiamiento di Hard Rock Hotel. Durante un conferencia di prensa antayera, minister Otmar Oduber di Turismo a declara cu ya caba a ricibi un peticion pa extende e periodo pa keda cla for di e desaroyado. Sinembargo e mandatario a duna di conoce cu intencion pa haci esaki ta hopi limita. Diamars a reuni cu Aruba Investment Bank (AIB) y minister lo mester a haya su contesta caba pa loke ta ki pasonan pa tuma.

“Mi ta kere nos a duna hopi espacio caba. Lo mester tin cartanan riba mesa cu ta bastante solido y cu AIB tambe ta para tras di dje. Pasobra na final banco ta lanta e garantia y si e banco ta pensa cu tin posibilidad, nan lo mester ta convenci di esaki pa nan por saca e garantia bek of duna un extension. Pasobra e banco ta esun cu a hinca den nan carta na final di mei cu esaki ta e ultimo extension. Riba esey nos ta wardando awor. E banco y e desaroyadonan mediante nan director ta esunnan cu tin cu notifica gobierno prome cu dia 30”, asina minister Oduber a splica.

Deadline 3’or

Esaki kiermen cu awetardi prome cu 3’or gobierno mester haya sa con a para cu e financiamiento di Hard Rock Hotel, pa asina por tuma un decision na ora prome cu e deadline cay definitivamente. Si acaso deadline pasa y AIB definitivamente no ta haya cu por extende mas, e ora ey banco lo cobra su garantia di dos milyon dollar y gobierno lo ehecuta e mocion cu parlamento di Aruba a aproba. Den esaki ta stipula cu den caso cu Hard Rock Hotel



no por wordo construi, gobierno mes lo tumba e ruina bieu di Bushiri Hotel abou y lo construi un area di recreacion publico cu beach.

Nada oficial ainda
 Mientras tanto, abogado

Baiz ta confirma na Bon Dia Aruba cu su cliente no a haya niun notificacion oficial ainda pa loke ta un decision di gobierno. Sinembargo e ta confirma cu Southwest Horeca no ta cla ainda y lo

mester di mas tempo pa yega na un financiado. “E ta un proceso cu ta canando y nos ta yegando hopi leu”, asina e ta declara. Con lihe lo por tin henter e financiamiento na ordo, sr. Baiz no por bisa. “E

ta depende. E por ta un luna, of tres of cinco.” E proyecto aki ta uno costoso, cu un balor di riba 100 milyon dollar y esaki ta haci proceso di financiamiento uno hopi complica y cu hopi partidonan. Mas specifico riba pakico den ultimo lunanan no por a keda cla cu financiamiento di hard Rock Hotel, sr. Baiz no kier a bay. “Si tabata na nos nos lo tabata cla caba”, segun e abogado di Southwest Horeca.

Mirando cu no tin nada oficial di gobierno riba mesa pa loke ta un extension of cancelacion definitivo di e proyecto, sr. Baiz ta declara enfaticamente na prome instante cu e no kier haci ningun declaracion. Pero den entrevista cu Bon Dia Aruba e

abogado a duna di conoce cu Southwest tin un par di opcion si acaso deadline pasa y AIB dicidi cu ta basta. “Nos por bay bek y papia cu gobierno y banco pa por splica e motibonan pakico el a bay asina.” Pero tambe - un biha mas enfatisando cu no kier declara algo mientras cu no tin un decision di gobierno riba mesa - sr. Baiz ta bisa cu tin e opcion pa hiba gobierno corte pa asina haya e extension toch, bou di e argumento cu compara cu otro proyectonan a haya poco tempo pa logra keda cla cu financiadonan y cu e proyecto ta di importancia grandi pa turismo di Aruba. E abogado ta bisa cu a base di ‘redelijheidsbeginself’ tin motibo pa duna un poco mas espacio pa e financiamiento di Hard Rock Hotel keda cla.

Chens ‘fifty-fifty’

Na mei, AIB y gobierno a duna e ultimo extension na e desaroyado local Southwest Horeca Development pa keda cla cu financiamiento di un hotel di 400 camber y un facilidad di un scol hotelero na e sitio unda awo te ainda e ruina di Bushiri Hotel ta para. Na cuminsamento di juli caba durante un conferencia di prensa, minister Oduber a duna di conoce cu e ta calcula e chens cu e desaroyado keda cla como ‘fifty-fifty’, despues di diferente extension cu gobierno a duna. □